



Նարինե Պետրոսյան

ՀԴՏՀ մագիստրանտ

2021 թ. գերազանցությամբ ավարտել է ՀԴՏՀ բակալավրիատը՝ «Տնտեսագիտություն» մասնագիտությամբ, ապա ընդունվել մագիստրատուրա՝ «Մակրոտնտեսական վերլուծություն» կրթական ծրագրով:

2020 թ.-ից աշխատում է Enlight հանրային հեղափոխությունների կենտրոն ՀԿ-ում՝ որպես տնտեսագետ-վերլուծաբան: Միաժամանակ, ներգրավվել է ՀԴՏՀ «Ամբերդ» հեղափոխական կենտրոնի հեղափոխական խմբերում՝ որպես հրավիրյալ փորձագետ:

Հեղինակ է 10-ից ավելի գիտական հրապարակումների, ինչպես նաև համահեղինակ՝ մեկ կոլեկտիվ մենագրության:

ԳԻՏՈՒԹՅԱՆ ԽԹԱՆՈՒՄԸ՝ ՈՐՊԵՍ ՀՀ ՏՆՏԵՍԱԿԱՆ ԱՌԱՋԸՆԹԱՅԻ ԳՐԱՎԱԿԱՆ.

ԿԻՐԱՌԱԿԱՆՈՒԹՅԱՆ
ԵՎ ՀԱՄԱԶԱՓ
ՖԻՆԱՆՍԱՎՈՐՄԱՆ
ԽԱՉՄԵՐՈՒԿՈՒՄ

DOI: 10.52174/2579-2989_2021_4_62

Հիմնաբառեր. գիտություն, կրթություն, համաչափ ֆինանսավորում, կիրառելիություն, գիտատեխնիկական հեղափոխություն

Գաղտնիք չէ, որ ժամանակակից տնտեսության մեջ, որպես կանոն, կարելի է ծեռք բերել մրցակցային առավելություն՝ գիտելիքի վրա հիմնված արտադրանքների տարբերակման շնորհիվ: Համաշխարհային շուկայում մրցունակ և գրավիչ լինելու, նոր ներդրումներ ներգրավելու և եղածն էլ արդյունավետ գործարկելու համար տարածաշրջանային անորոշության և սակավ հնարավորությունների պայմաններում «գոյատևող» ՀՀ-ն, առավել քան երբևէ, պետք է կարևորի գիտության ոլորտի նպատակաուղղված ֆինանսավորումը՝ պայմանավորված տնտեսական աճի որակապես նոր գործոնների առաջացման և առաջնորդման անհրաժեշտությամբ: Վերոնշյալ խնդիրների պարզաբանմանն է անդրադարձել հոդվածագիրը:


Հասարակության գոյության ամբողջ պատմության ընթացքում կատարելության ճրգ-տումը ստիպում է պայքարել և հասնել առավելագույն արդյունքի՝ շրջապատից տարբերվելու և ինքնաբավ լինելու համար: Այս սկզբունքը ենթագիտակցորեն գործում է հասարակության գերակշիռ մասում՝ դուրս գալով անհատական ըմբռնման շրջանակից և դրսևորվելով նաև պետության մակարդակում: Լավագույնին հասնելու այդ ձգտումն էլ ստիպում է գտնել զարգացման այլընտրանքային ուղիներ, որոնցից ներկայում, թերևս, առաջանցիկ զարգացման տեմպեր է ցուցաբերում գիտահետազոտական և բարձր տեխնոլոգիական ոլորտը: Այնտեղ, որտեղ ֆիզիկական ուժն անկարող է, օգնության են գալիս մարդկային մտածողությունն ու բանականությունը՝ բացահայտելով խնդրի լուծման այլընտրանքային ուղիներ ու հեշտացնելով արդեն իսկ տասնապատիկ ան-

գամ դյուրին դարձած մարդկային կյանքը: Այն, ինչ անհնար էր թվում տարիներ առաջ, այժմ արդեն իրողություն է: Այս շղթան, վստահաբար, կրելու է շարունակական բնույթ, իսկ գալիք սերունդներն ականատես են լինելու մերօրյա իրականության այլակերպված տարբերակին:

Այն պարագայում, երբ տնտեսության ավանդական ճյուղերը կորցրել են իրենց նախկին ներուժն ու դերը, գիտությունն ու տեխնոլոգիան դարձել են յուրաքանչյուր երկրի և հասարակության զարգացման հիմնաքարը: Գիտատեխնիկական ոլորտի առաջխաղացման, ֆինանսավորման և ստեղծված արդյունքի կիրառելիության խնդիրները բազմաշերտ են ու բազմաբնույթ, իսկ դրանց արմատները, մեր կարծիքով, պետք է փնտրել նաև հասարակական մտածելակերպի, գիտության նկատմամբ հանրության վերաբերմունքի և պետական մակարդակով ոլորտի ոչ բավարար արժևորման մեջ: Վերը թվարկվածը շղթայական սկզբունքով հանգեցնում է որակյալ կադրերի պատրաստմանը, գիտության նկատմամբ երիտասարդների հե-

տաքրքրության նվազմանը վերաբերող և բազմաբովանդակ այլ հիմնահարցերի:

Վերջին տարիներին հաճախ է խոսվում գիտելիքահեղձ տնտեսության կարևորության մասին, քայլեր են կատարվում գիտության ոլորտի առաջանցիկ զարգացում ապահովելու նպատակով, մասնավորապես՝ գիտական և գիտատեխնիկական գործունեության նորմատիվ-իրավական դաշտի կատարելագործում, պետական բյուջեից գիտական ծրագրերի ու թեմաների մրցութային և ծրագրային ֆինանսավորման համակարգի ներդրում և այլն¹: Այնուամենայնիվ, ֆինանսավորման՝ շատ հաճախ ոչ նպատակային և չթիրախավորված լինելը հանգեցնում է նրան, որ կատարված հետազոտությունները հայտնի են դառնում միայն ակադեմիական շրջանակներում, իսկ դրանց գործնական կիրառումը պետության կողմից դիտվում է որպես ոչ նպատակային: Առկա է նաև խնդրի մեկ այլ կողմ, երբ պետական ֆինանսավորում չստացած հետազոտությունները, որոնք առաջադրում են գոյություն ունեցող խնդիրների լուծման թիրախային տարբերակներ,



ԳԾԱՊԱՏԿԵՐ 1

Գիտատեխնիկական գործունեությունն ըստ ցուցանիշների և տարիների²

¹ ՀՀ կառավարության 2019 թ. մայիսի 16-ի N 650-Լ որոշման հավելված, Կառավարության 2019-2023 թթ. գործունեության ծրագրի կատարումն ապահովող միջոցառումներ, <http://scs.am/files/2019-2023-kar-mijocarumeri-cank-gitutyun.pdf>

² ՀՀ ՎԿ, տվյալների բանկ, Գիտատեխնիկական գործունեություն՝ ըստ ցուցանիշների և տարիների, https://armstatbank.am/pxweb/hy/ArmStatBank/ArmStatBank__2%20Population%20and%20social%20processes__22%20Education/PS-ED-19-2020.px/?rxid=dc3dc9a7-732b-41db-84ab-83b3fa339a14


այդպես էլ մնում են թղթի վրա:

Թեև 2010 թ.-ի համեմատությամբ՝ անվանական արտահայտությամբ գիտական և գիտատեխնիկական գործունեության ծրագրերի գծով պետական բյուջեի հատկացումներն ավելացել են շուրջ 2 անգամ (2020 թ. դրությամբ), ֆինանսավորման հարաբերական ցուցանիշները զիջում են մի շարք զարգացած և զարգացող երկրների համապատասխան ցուցանիշներին³ (գծապատկեր 1): 2021 թ. «Գիտական և գիտատեխնիկական հետազոտությունների ծրագրի» համար նախատեսվել է 13,559.7 մլն դրամ՝ 2020 թվականի 14,062.2 մլն դրամի դիմաց, իսկ ծախսերը նվազել են 502.5 մլն դրամով կամ 3.6 տոկոսով⁴:

Վերոնշյալ ծրագրի շրջանակներում «Գիտական ենթակառուցվածքի արդիականացում» միջոցառման համար նախատեսվել է 7,367.1 մլն դրամ՝ 2020 թվականի 7,928.8 մլն դրամի դիմաց կամ 561.7 մլն դրամով պակաս: Գումարի չափը սահմանվել է՝ ըստ միջոցառման ցանկում ընդգրկված կազմակերպությունների ներկա-

յացրած բյուջետային հայտերի, ինչպես նաև ՀՀ ԿԳՄՍ նախարարի հրամանով ձևավորված միջգերատեսչական մրցութային հանձնաժողովի քննարկման արդյունքում հնչած առաջարկությունների՝ գիտական կազմակերպությունների և բուհերի գիտական ստորաբաժանումների զարգացման ծրագրերի իրականացման, գիտական սարքավորումների արդիականացման, միջազգային համագործակցության աջակցության նպատակով (գծապատկեր 2):

Կարևոր է ընդգծել, որ ԵՄ երկրներում հետազոտությունների և մշակումների վրա կատարվող համախառն ծախսերի՝ միջինում 1/3-ը բաժին է ընկնում պետությանը, իսկ մնացած մասն իրականացվում է մասնավոր աղբյուրներից⁵: Հայաստանյան վիճակագրական աղբյուրների ուսումնասիրությունից նկատելի է դառնում մասնավոր հատվածի կողմից հետազոտությունների և մշակումների ուղղությամբ կատարվող ծախսերի տարբերությունը ԵՄ երկրների համապատասխան միջին ցուցանիշից: Ֆինանսավորման ընդլայնման քաղաքա-



ԳԾԱՊԱՏԿԵՐ 2



Հետազոտությունների և մշակումների վրա կատարվող ծախսերն ըստ տարիների⁶

³ Research and development expenditure (% of GDP), <https://data.worldbank.org/indicator/GB.XPD.RSDV.GD.ZS>

⁴ Հայաստանի Հանրապետության 2021- 2023 թթ. պետական միջնաժամկետ ծախսերի ծրագիր, <http://scs.am/files/mjcc-21-23-10.07.2020-1212-hav.pdf>


⁵ Translate Research and development statistics at regional level, Eurostat regional yearbook, https://ec.europa.eu/eurostat/statistics-explained/index.php?title=Research_and_development_statistics_at_regional_level

⁶ ՀՀ ՎԿ, տվյալների բանկ, Հետազոտությունների և մշակումների վրա կատարվող ծախսերն ըստ տարիների, https://armstatbank.am/pwweb/hy/ArmStatBank_2%20Population%20and%20social%20processes__22%20Education/PS-ED-19-2020.px/?rid=dc3dc9a7-732b-41db-84ab-83b3fa339a14

կանության կարևոր ուղղություններից մեկն էլ դառնալու է մասնավոր հատվածի կողմից հետազոտությունների ու մշակումների ուղղությամբ ծախսերի կատարման խթանումը:

Ֆինանսական խնդրից զատ, որպես գիտելիքահենք տնտեսության զարգացմանը խոչընդոտող գործոններ, կարելի է առանձնացնել գիտելիքի ձեռքբերման և տարածման բարենպաստ միջավայրի բացակայությունը, արդյունաբերության մի շարք ենթաճյուղերում հետամնաց տեխնոլոգիաների առկայությունը, գիտական աշխատանքով զբաղվելու խթանների և գիտական բարձր որակավորման պահանջարկվածության բացակայությունը և այլն: Չափազանց կարևոր դեր ունեն նաև գիտական կադրերի հետ կապված հիմնախնդիրները: Խորհրդային Միության փլուզումից հետո դիտարկվում է գիտական կադրերի համընդհանուր ծերացում, իսկ որոշ ասպարեզներում՝ ամբողջ գիտական դպրոցների վերացում: Գիտական ներուժի վերարտադրությանն ուղղված նպատակային քաղաքականության բացակայությունը հանգեցնում է գիտական և գիտամանկավարժական կադրերի ոչ արդյու-

նավետ սերնդափոխության, ինչպես նաև երիտասարդ կադրերի արտահոսքի (գծապատկեր 3), ինչի հետևանքով էլ լուրջ դժվարություններ են առաջանում գիտության զարգացման համար: Գիտության ոլորտի արդյունավետ սերնդափոխություն ապահովելու նպատակով ՀՀ ԿԳՄՍՆ գիտության պետական կոմիտեն մշակել է գիտության ոլորտ երիտասարդ կադրերի ներգրավման ծրագիր⁷, որի նպատակն է ստեղծել աշխատանքային և սոցիալ-տնտեսական համապատասխան պայմաններ երիտասարդ գիտաշխատողների ստեղծագործական ներուժի օգտագործման համար, ինչպես նաև իրականացնել միջոցառումներ գիտության ոլորտի գրավչության մակարդակի բարձրացման ուղղությամբ: Եվ, ի վերջո, գիտական և գիտատեխնիկական գործունեության բնագավառի նյութատեխնիկական բազան և ենթակառուցվածքները սահմանափակում են ժամանակակից գիտության պահանջներին համապատասխանող հետազոտությունների իրականացման հնարավորությունները և չեն ապահովում գիտական ներուժի արդյունավետ օգտագործում: Սարքավորումների մեծ մասը հնացած է, ինչն էլ խոչընդոտում




ԳԾԱՊԱՏԿԵՐ 3

Գիտական աշխատողների թվաքանակն ըստ տարիքային խմբերի⁸

⁷ ՀՀ ԿԳՄՍՆ գիտության կոմիտե, 2020-2022 թթ. միջնաժամկետ ծախսերի ծրագիր և 2020 թ. բյուջետային ֆինանսավորման հայտ, հավելված N12, էջ 23, <http://scs.am/uploaded/mjcc-2020-2022-Byujetayin-hayt.pdf>

⁸ ՀՀ ՎԿ, տվյալների բանկ, Գիտական աշխատողների թվաքանակն ըստ տարիքային խմբերի, https://armstatbank.am/pxweb/hy/ArmStatBank/ArmStatBank_2%20Population%20and%20social%20processes__22%20Education/PS-ED-19-2020.px/?rxid=dc3dc9a7-732b-41db-84ab-83b3fa339a14



■ Գիտատեխնիկական գործունեություն իրականացնող կազմակերպությունների թվաքանակը

ԳԾԱՊԱՏԿԵՐ 4



Գիտատեխնիկական գործունեություն իրականացնող կազմակերպությունների թվաքանակը⁹

է բարձր մակարդակի գիտական, հատկապես կիրառական բնույթի հետազոտությունների կատարմանը:

Նշված հիմնախնդիրներն իրենց արտացոլումն են գտնում տնտեսությունում կատարվող նորարարությունների ծավալում: Թեև բարձր տեխնոլոգիաները համարվում են գերակա ոլորտ ու կոչված են նպաստելու ողջ տնտեսության մրցունակության բարձրացմանը, և վերջին տարիներին միջազգային տարբեր զեկույցներ վկայում են որոշակի առաջընթացի մասին, այդուհանդերձ, այդ փոփոխությունները դեռևս նշանակալի չեն¹⁰: Մի շարք դեպքերում ստեղծված կիրառական գիտական արդյունքները մրցունակ չեն համաշխարհային նորարարությունների շուկայում: Վերջինս ունի իր օբյեկտիվ և սուբյեկտիվ պատճառները: Այն հանգամանքը, որ գիտական հետազոտությունների համար չկան զարգացած ենթակառուցվածքներ, հանգեցնում է կիրառական գիտական արդյունքների մրցունակության անկմանը: Հայաստանում գրեթե բացակայում են արտադրական «հսկաները», որոնց շուրջ կարող են ձևավորվել գիտաարտադրական միավորումներ, ինչն էլ, իր հերթին, կարող է խթանել արտադրության գործընթացի կատարելագործումը, ինչպես նաև գիտության ոլորտի ֆինանսա-


վորման մեջ տնտեսության մասնավոր հատվածի մասնաբաժնի բարձրացումը:

Գիտության զարգացումը պահանջում է համակարգի ինստիտուցիոնալ բարեփոխումներ: Անհրաժեշտ է իրականացնել գիտական և գիտատեխնիկական գործունեության բնագավառի օպտիմալացում և կառուցվածքային վերաձևումներ՝ միավորելով միևնույն գիտական ուղղության պետական կազմակերպություններն անկախ գերատեսչական պատկանելությունից: Համաձայն ՎԿ տվյալների՝ ՀՀ նախարարություններին կից գործում է գիտատեխնիկական աշխատանք իրականացնող շուրջ 65 կազմակերպություն (2021 թ. դրությամբ): Որպես գործունեության արդյունավետության բարձրացման ուղղություն՝ կարելի է դիտարկել առնվազն դրանց մի մասի ընդգրկումը ՀՀ բուհերի կամ նույն ուղղվածության գիտական կազմակերպությունների կազմում: Դա մի կողմից նախարարություններին կստիպի սերտորեն համագործակցել գիտահետազոտական ինստիտուտների հետ, իսկ մյուս կողմից՝ գիտական հետազոտությունների արդյունքները վերածել նախարարությունների կողմից իրականացվող քաղաքականության:

Ուշագրավ է նաև այն, որ գիտահետազոտական ինստիտուտների ընդհանուր թիվն ունի կրճատման միտում. 2010 թ.-ին

⁹ ՀՀ ՎԿ, տվյալների բանկ, Գիտատեխնիկական գործունեություն իրականացնող կազմակերպությունների թվաքանակը, https://armstatbank.am/pxweb/hy/ArmStatBank/ArmStatBank__2%20Population%20and%20social%20processes__22%20Education/PS-ED-19-2020.px/table/tableViewLayout1/?rxid=dc3dc9a7-732b-41db-84ab-83b3fa339a14

¹⁰ Technology and Innovation Report 2021, <https://unctad.org/page/technology-and-innovation-report-2021>



ԳԾԱՊԱՏԿԵՐ 5

Գիտատեխնիկական գործունեություն իրականացնող կազմակերպությունների բաշխվածությունն ըստ մարզերի¹¹

առկա 81 ինստիտուտից 2020 թ.-ին գործել է 65-ը: Այսինքն՝ 2010-2020 թթ.-ին գիտատեխնիկական գործունեություն իրականացնող կազմակերպությունների թիվը, ընդհանուր առմամբ, կրճատվել է 16-ով (գծապատկեր 4): Նման միտումը պայմանավորված է ինչպես գիտական կազմակերպությունների օպտիմալացմամբ, այնպես էլ որոշ գիտահետազոտական ինստիտուտներին հատկացվող ֆինանսական ռեսուրսներով, ինչպես նաև անձնակազմի արտադրողականությամբ, որոնք կենտրոնացված կերպով կարգավորելն ավելի նպատակահարմար է:

Կարևորվում են նաև գիտական կազմակերպությունների գործունեության արդյունավետության գնահատման ժամանակակից կառուցակարգերի մշակումն ու ներդրումը՝ ապահովելով պետական ֆինանսավորման ծավալների ուղղակի կախվածություն արդյունքներից և ստեղծելով խրախուսման համապատասխան եղանակներ: Նման կառուցակարգերի ներդրումը պետք է զուգակցել նաև բարձր արդյունավետություն ցուցաբերող գիտաշխատողների անհատական խրախուսման ծրագրի հետ՝ այդպիսով նպաստելով ինչպես ոլորտի սոցիալական արդարացիության մակարդակի բարձրացմանը, այնպես էլ երիտասարդ գիտաշխատողների մեջ սեփական աշխատանքային առաջընթացի նկատմամբ վստահության աստիճանի ավելացմանը:

Հայաստանում քննարկվող ոլորտի հուզող հիմնահարցերից է նաև գիտության տարածքային բաշխվածության անհամաչափությունը: 2021 թ. հուլիսի դրությամբ գիտատեխնիկական աշխատանքներ իրականացնող 65 կազմակերպությունից մարզերում գործում է միայն 7-ը. երեքական կազմակերպություն՝ Շիրակի և Արագածոտնի, մեկը՝ Արարատի մարզում (գծապատկեր 5): Մնացած մարզերում գիտահետազոտական ինստիտուտներ առկա չեն: Պետական քաղաքականությունն այս առումով պետք է վերանայել՝ նպատակաուղղելով նաև մարզերում գիտության զարգացմանը: Ուստի տարածքային համաչափ զարգացման քաղաքականության հիմքում պետք է լինի նաև գիտության տարածքային համաչափ զարգացման խնդիրը: Մյուս կողմից՝ հարկ է հաշվի առնել այն հանգամանքը, որ մարզերում գիտության զարգացումն ինքնանպատակ լինել չի կարող, և այն պետք է պայմանավորված լինի տնտեսության ճյուղային զարգացման առանձնահատկություններով:

Ամփոփելով մեր ուսումնասիրությունը՝ կարող ենք ասել, որ ՀՀ-ում առկա են ոլորտային բազմաթիվ խնդիրներ, որոնց խորքային լուծման համար պահանջվում է շարունակական վերահսկողության և հետևողական ֆինանսավորման ապահովում: Գիտական և գիտակրթական կադրերի պատրաստման ժամանակակից եղանակների ներդրման ուղղությամբ կարևոր քայ-

¹¹ Հայաստանի Հանրապետության սոցիալ-տնտեսական վիճակը 2021 թ. հունվար-հունիսին: Գիտատեխնիկական աշխատանքները 2020 թ., https://armstat.am/file/article/sv_06_21a_5130.pdf

լերից մեկը պետք է լինի հետազոտական համալսարանների ստեղծումը: Համաշխարհային փորձը ցույց է տալիս, որ նմանատիպ համալսարաններում հնարավոր է անհամեմատ ավելի բարձր արդյունավետությամբ զուգակցել ուսուցման գիտական և կրթական բաղադրիչները: Կարևոր է նաև գիտական կազմակերպությունների համար նպաստավոր տնտեսական միջավայրի ձևավորումը՝ այդպիսով ընդլայնելով ձեռնարկատիրական գործունեություն իրականացնելու հնարավորությունները: Միաժամանակ, գիտության առևտրայնացման նպատակով կիրառական բնույթի հետազոտությունների դեպքում

պահանջվում է ապահովել պետական օժանդակություն, ամրապնդել պետություն-մասնավոր հատված գործընկերությունը՝ վերջինիս հետ համաֆինանսավորման սկզբունքով իրականացնելով ծրագրեր: Թիրախային նպատակներից մեկը պետք է լինի նաև գիտական արդյունքների առևտրայնացման կենտրոնների ձևավորումը, որոնք պետք է կատարեն յուրօրինակ միջնորդի դեր արտադրողների և գիտնականների միջև՝ վերջիններիս ներկայացնելով առաջինների կարիքները, այնուհետև ապահովելով ստեղծված արդյունքների առևտրայնացում:

ՕԳՏԱԳՈՐԾՎԱԾ ԳՐԱԿԱՆՈՒԹՅՈՒՆ

- Հայաստանի Հանրապետության սոցիալ-տնտեսական վիճակը 2021 թ. հունվար-հունիսին, Գիտատեխնիկական աշխատանքները 2020 թ., https://armstat.am/file/article/sv_06_21a_5130.pdf
- ՀՀ 2021-2023 թթ. միջնաժամկետ ծախսերի ծրագիր, <http://scs.am/files/mjcc-21-23-10.07.2020-1212-hav.pdf>
- ՀՀ կառավարության 2019 թ. մայիսի 16-ի N650-Լ որոշման հավելված, Կառավարության 2019-2023 թթ. գործունեության ծրագրի կատարումն ապահովող միջոցառումներ, <http://scs.am/files/2019-2023-kar-mijocarumneri-cank-gitutyun.pdf>
- ՀՀ ԿԳՄՄՆ գիտության կոմիտե, 2020-2022 թթ. միջնաժամկետ ծախսերի ծրագիր և 2020 թ. բյուջետային ֆինանսավորման հայտ, հավելված N12, էջ 23, <http://scs.am/uploaded/mjcc-2020-2022-Byujetay-in-hayt.pdf>
- ՀՀ ՎԿ, տվյալների բանկ, Գիտական աշխատողների թվաքանակն ըստ տարիքային խմբերի, https://armstatbank.am/pxweb/hy/ArmStatBank/ArmStatBank__2%20Population%20and%20social%20processes__22%20Education/PS-ED-19-2020.px/?rxid=dc3dc9a7-732b-41db-84ab-83b3fa339a14
- ՀՀ ՎԿ, տվյալների բանկ, Գիտատեխնիկական գործունեություն իրականացնող կազմակերպությունների թվաքանակը, https://armstatbank.am/pxweb/hy/ArmStatBank/ArmStatBank__2%20Population%20and%20social%20processes__22%20Education/PS-ED-19-2020.px/table/tableViewLayout1/?rxid=dc3dc9a7-732b-41db-84ab-83b3fa339a14
- ՀՀ ՎԿ, տվյալների բանկ, Հետազոտությունների և մշակումների վրա կատարվող ծախսերն ըստ տարիների, https://armstatbank.am/pxweb/hy/ArmStatBank/ArmStatBank__2%20Population%20and%20social%20processes__22%20Education/PS-ED-19-2020.px/?rxid=dc3dc9a7-732b-41db-84ab-83b3fa339a14
- Research and development expenditure (% of GDP), <https://data.worldbank.org/indicator/GB.XPD.RSDV.GD.ZS>
- Technology and Innovation Report 2021, <https://unctad.org/page/technology-and-innovation-report-2021>
- Translate Research and development statistics at regional level, Eurostat regional yearbook, https://ec.europa.eu/eurostat/statistics-explained/index.php?title=Research_and_development_statistics_at_regional_level

Нарине ПЕТРОСЯН
 Магистрант, АГЭУ

МЕЖДУНАРОДНОЕ ПРАВО

РАЗВИТИЕ НАУКИ КАК ГАРАНТ ЭКОНОМИЧЕСКОГО ПРОГРЕССА РА: НА ПЕРЕКРЕСТКЕ ПРИМЕНИМОСТИ И СИММЕТРИЧНОГО ФИНАНСИРОВАНИЯ

Не секрет, что в современной экономике конкурентное преимущество достигается прежде всего за счет дифференциации продуктов, основанных на знаниях. Чтобы быть конкурентоспособным на мировом рынке, быть привлекательным, привлекать новые инвестиции и эффективно использовать имеющиеся возможности, целевое финансирование в области науки должно стать краеугольным камнем для «выживания» Армении в условиях региональной неопределенности и нестабильности в связи с необходимостью создания и продвижения качественно новых факторов экономического роста. Автор сослался на прояснение вышеупомянутых проблем в своей статье.

Ключевые слова: наука, образование, пропорциональное финансирование, применимость, научные и технические исследования

Narine PETROSYAN
 MA Student, ASUE

INTERNATIONAL LAW

PROMOTION OF SCIENCE AS A GUARANTEE OF ARMENIAN ECONOMIC PROGRESS: CROSSROADS OF APPLICABILITY AND SYMMETRICAL FUNDING

It is no secret that in modern economy, competitive advantage is achieved primarily through the differentiation of knowledge-based products. In order to be competitive in the world market, be attractive, attract new investments and effectively use existing opportunities, targeted funding in the field of science should become the cornerstone for Armenia's "survival" in the conditions of regional uncertainty and instability in terms of the need to create and promote qualitatively new factors of economic growth. The author refers to the clarification of the above-mentioned issues in her article.

Key words: science, education, symmetrical funding, applicability, scientific and technical research